



Petrus Buflerus in oppido Imperij Isna ¹⁴⁷⁵ hodie natus, & in omni genere uirtutum optimè educatus fuit. Is cū adoleuisset, magno successu mercaturam exercuit, atq; ex honesta familiaria uxorem duxit, et in senatum coopatus fuit. Erat autē ab ineunte ætate religionis studiosissimus, atq; omnium pauperum, præsertim ministrorum Ecclesiæ, curam habuit. hinc factū ut domus ipsius quasi omnium pauperum perfugium, & ministrorum Euangelij hospitium esset, in quo egentes & miseri excipiebantur, nec quisquam eorum sine honesto uitatico dimittebat. Eius uxor mariti hortatu quosuis ægros ultrò accedebat, atq; tenuis fortunæ homi-

nes medicamentis comparatis contrectabat & curabat. Itaq; potissimum huius Petri opera Euangelij doctrina in patriam perducta, dum Ambrosium Blaunerum eius Ecclesiæ reformatorem proprijs sumptibus in suis ædibus aluerit, & ut ex Verbo Dei omnia præscriberet, animarit. Cum autem talis Petrus esset, cogitabat non modò miserorum inopiæ in hac uita succurrere, sed etiam Euangelij doctrinam in sua patria, cæterisq; uicinis aliquot oppidis, ad posteros propagare, ut in ijs locis semper idonei doctores essent, qui uerbo Dei hominibus uiam ad cœlestem gloriam patefacerent. Ad eam rem cum scholarum prudenti constitutione, tum etiã stipendijs opus esse iudicauit. quamobrem urbem Argentoratum elegit, atq; iuuenes delectos ex singulis oppidis, ad quos suum beneficium pertinere uolebat, anno 1536 eò transmisit, ut sua liberalitate tam diu alerētur, donec in literis optimè instituti cum utilitate in patriam reuocarentur. Hoc unius Bufleri exemplum Senatus Argentinensis secutus, longè utilissimum gymnasium in sua urbe ædificauit, & omnium bonarum artium disciplinas, atq; in primis diuinarum literarum scientiam, in eo iuuentuti exponi iussit. Itaq; schola Argentinensis sua initia huic Petro aliquomodo accepta referre debet.